

La Posta serra onn per onn 100 uffizis da posta

PostCom vul dapli cumpetenzas

DA LUCAS DEPLAZES / ANR

■ **La sminuaziun dal traffic da posta e novs basegns sforzan La Posta da far adattaziuns. La concorrenza privata funcziuna e fa pressiuin.** A chaschun da la conferenza da medias annuala a Berna ha punctuà *Hans Hollenstein*, il president da la cumissiuin da surveglianza «PostCom», che La Posta haja adempli las prescripziuns da la lescha, gea schizunt surpassà quellas. Las prestaziuns da La Posta èn dad fitg auta qualitat.

Tut ils criteris prescrits vegnan ademplids. Tenor ina retschertga e giudicaziun da l'Uniun postale universal dispona la Svizra d'ina da las meglras postas dal mund, ha confermà Hollenstein ier a Berna. La Posta po garantir il servetsch da basa or d'atgnas forzas finanzialas.

Prestaziuns

La sminuaziun dal traffic al spurtegl, novas pussaivladads tecnicas e novs giavischs da la clientella sforzan La Posta da s'adattar. Dapi l'entschatta da quest tshientaner ha serrà La Posta mintg'onn var 100 uffizis. La raschun è la sminuaziun dal traffic, da las brevs, dals pachets e dals pajaments.

Plinavant senta La Posta er la concorrenza privata. Ils uffizis da posta existents na vegnan betg simplamain serrads. La Posta tshertga – ensemen cun ils clients pertutgads – novas soluziuns, sco agenturas da posta, servetsch da chasa u ina schliaziun individuala. In problem da schliar è la distribuziun per chasadas allontanadas. Hollenstein è perquai er satisfatg dal resultat da la gruppa da lavur, instradada da cussegliera federala *Doris Leuthard*. Quai saja necessari da megliar il servetsch postal da



La sminuaziun dal traffic al spurtegl, novas pussaivladads tecnicas e novs giavischs da la clientella sforzan La Posta da s'adattar.

KEYSTONE

las agenturas e da definir novs criteris da cuntanschibladad per regions periferas. En l'avegnir quinta La Posta da mantegnair 800 fin 900 uffizis da posta tradiziunals. Ella prevesa dentant d'augmentar ils puncts d'access sin var 4000 e d'installar novas purschidas che correspundan als giavischs dal client.

Concorrenza

Actualmain transporta La Posta la pli gronda part da las brevs, grazia a ses monopol fin 50 grams. La cumpart dals pachets, che n'en betg suttames al monopol, munta ad 84%. Las organizaziuns privatas (172) transportan 16%. La concorrenza funcziuna, ha constatà

Hollenstein. Quella vegnia pervia da fermes purschiders (Amazon, Alibaba) pli e pli dira.

Perquai è PostCom vidlonder d'elavurar novs criteris per l'engaschament dal personal (paja, cundiziuns da lavur, vacanzas) che duain evitar in dumping da paja.

Intervenziuns politicas

Dira critica gist en connex cun la midada da structura da la rait dals uffizis da posta ha provocà diversas intervenziuns sin il plaun politic. PostCom sustegna las propostas en discussiun, numnadamain da precisar il criteris davart la cuntanschibladad al proxim uffizi da posta en las regions da muntonga e d'extender las prestaziuns da las agenturas (guarda fanestra).

Dapli cumpetenzas

PostCom ha tractà l'onn passà 32 reclamazions da singuls burgais. PostCom po dentant mo far propostas. La decisiun prenda oz en mintga cas La Posta. Hollenstein vul perquai er la cumpetenza da pudair prender decisiuns definitivas. Quella pretensiun fa er il chantun Giura en sia intervenziun al parlament. Il cussegl dals chantuns è gia sa mussà qua bainvulent.

Adattaziuns da la lescha da Posta

Sin fundament da diversas intervenziuns politicas ha la cumissiuin per traffic e telecommunicaziun formulà diversas adattaziuns tar la lescha davart La Posta. Concret duain vegnir definids agens criteris regionalis per cuntanscher il proxim punct d'access. Las agenturas duain porscher las medemas prestaziuns sco ils uffizis da posta tradiziunals.

Il cussegl dals chantuns ha gia acceptà las propostas. Quest'emna è prevista la debatta parlamentara en il cussegl naziunal. Accepta quel la moziun sto il cussegl federal preparar in sboz per mauns dal parlament.